

四庫全書

集部

欽定四庫全書

御定佩文齋詠物詩選卷一百十六

苑類

五言古

侍宴樂遊苑餞徐州刺史應詔

梁
沈約

沃若動龍駢參差凝鳳管金塘草未合玉池泉將滿

遊建興苑

梁
紀少瑜

丹陵抱天邑紫淵更上林銀臺懸百仞玉樹起千尋水
流冠蓋影風揚歌吹音踟躕憐拾翠顧步惜遺簪日落
庭光轉方慙屢移陰願言樂未極不道愛黃金

御幸樂遊苑侍宴

陳

張正見

大君臨四表榮光普八埏區中文化洽海外武功宣鳳
下書丹篆龜符著綠編昆明不習戰雲夢豈遊岐軌文
通萬國旌節靖三邊高秋藐姑射睿想屬汾川兩宮明
合璧雙闕帶非煙揚鑿出城觀詔蹕指郊壇禁苑迴雕

輦離宮建翠旃流水奔雷轂追風赴電鞭畫熊飄折羽
金埒響膠弦鳴玉升文砌稱觴溢綺筵獸舞依鐘石鸞
歌應管絃霞明黃鵠路風爽白雲天潦收荷蓋折露重
菊花鮮上林賓早鴈長楊唱晚蟬小臣慚藝業擊壤慕
懷鉛康衢飛駛羽大海滴微涓詠歌還集木舞蹈遂臨
泉願薦南山壽明明奉萬年

五言律

中秋月直禁苑

唐
鄭畋

禁署方懷忝綸闈已再加暫來西掖路還整上清槎恍
惚歸丹地深嚴宿絳霞幽襟聊自適閒弄紫薇花

七言律

苑中

唐

韓偓

上苑離宮望處迷相風高與露盤齊金階鑄出狻猊立
玉柱雕成翡翠樓外使調鷹初得按中官過馬不教嘶
笙歌錦繡雲霄裏獨許詞臣醉似泥

從遊西苑

明

楊士奇

廣寒宮殿屬天家曉從宸遊駐翠華瓊液總頌仙掌露
金枝皆插御筵花棹穿萍藻波間雪旗颭芙蓉水上霞
身世直超人境外玉盤親捧棗如瓜

春日遊東苑應制

明林鴻

長樂鐘鳴玉殿開千官步輦出蓬萊已教旭日催龍馭
更借春流泛羽杯堤柳欲眠鶯喚起宮花乍落鳥銜來
宸遊好續簫韶奏京國於今有鳳臺

秋日再經西苑

明文徵明

內苑秋清宿露晞
盈盈日采動金扉
松間翠殿團華蓋
天外銀橋入紫微
錦纜稀遊青雀暗
瑤波無際白鷗飛
彤牆高柳無人折
時見中官一騎歸

七言絕句

漢苑行

唐
張仲素

二月春光變柳條
九天清樂奏雲韶
蓬萊殿後花如錦
紫閣塔前雪未消

其二

回鴈高飛太液池
新花低發上林枝
年光到處皆堪賞
春色人間總未知

其三

春風澹澹影悠悠
鶯囀高枝燕入樓
千步迴廊聞鳳吹
珠簾處處上銀鉤

苑中寓直

明
夏言

湧玉亭前夜放舟
碧荷香淨雨初收
遙看北岸紅煙裏
水殿珠簾盡上鉤

御定佩文齋詠物詩選卷一百十六

欽定四庫全書

御定佩文齋詠物詩選卷一百十七

臺榭類

四言古

靈臺詩

漢班固

乃經靈臺靈臺既崇帝勤時登爰考休徵三光宣精五行布序習習祥風祁祁甘雨百穀蓁蓁庶草蕃廡屢惟豐年於皇樂胥

五言古

臨高臺

齊王融

遊人欲騁望積步上高臺
井蓮當夏吐窓桂逐秋開
花飛低不入鳥散遠時來
還看雲棟影含月共徘徊

登高臺

梁王僧孺

試出金華殿聊登銅雀臺
九路平如掌千門洞已開
軒車映日過簫管逐風來
若非邯鄲美便是洛陽才

宮殿名登高臺詩

陳祖孫登

獨有相思意聊敞鳳凰臺
蓮披香稍上月明光正來
離鶴將雲散飛花似雪迴
遙思竹林友前窓夜夜開

宓公琴臺詩

唐高適

皤皤邑中老自誇邑中理
何必升君堂然後知君美
開門無犬吠早卧常晏起
昔人不忍欺今我還復爾

登單父陶少府半月臺

唐李白

陶公有逸興不與常人俱
築臺像半月迴出高城隅
置酒望白雲商飈起寒梧
秋山入遠海桑柘羅平蕪
水色

綠且明令人思鏡湖終當過江去愛此甃踟蹰

小臺

唐白居易

新樹低如帳小臺平似掌六尺白藤牀一莖青竹杖風
飄竹皮落苔印鶴迹上幽逕與誰同閒人自來往

新構亭臺示諸弟姪

白居易

平臺高數尺臺上結茅茨東西疏二牖南北開兩扉蘆
簾前後卷竹簟當中施清泠白石枕疎涼黃葛衣開於
向風坐夏日如秋時笑傲頗有趣窺臨不知疲東窓對

華山三峰碧參差南檐當渭水卧見雲帆飛仰摘枝上
果俯折畦中葵足以充饑渴何必慕甘肥况有好羣從
旦夕相追隨

題嶽麓道卿臺

宋 范成大

山外江水黃江外滿城綠城外杳無際天低到平陸長
煙貫楚尾遠勢帶吳蜀故園東北望遊子闌干曲

七言古 附長短句

春臺望

唐 明 皇

暇景屬三春高臺聊四望目極千里際山川一何壯太
華見重巖終南分疊嶂郊原紛綺錯參差多異狀佳氣
滿通溝遲步入綺樓初鶯一一鳴紅樹歸鴈雙雙去綠
洲太液池中下黃鶴昆明水上映牽牛聞道漢家全盛
日別館離宮趣非一甘泉逶迤亘明光五柝連延接未
央周廬微道縱橫轉飛閣迴軒左右長須念作勞居者
逸勿言我後馬能恤為想雄豪壯栢梁何如儉陋卑茅
室陽烏黯黯向山沈夕鳥喧喧入上林薄暮賞餘迴步

輦還念中人罷百金

雍臺歌

唐
溫庭筠

太子池南樓百尺入窓新樹疎
簾隔黃金鋪首畫鈎陳
羽葆亭童拂交戟盤紆欄楯臨
高臺帳殿臨流鸞扇開
早鴈驚鳴細波起映花鹵簿龍
飛迴

五言律

文翁講堂

唐
盧照鄰

錦里淹中館岷山稷下亭
空梁無燕雀古壁有丹青
槐

落猶疑市苔深不辨銘良哉二千石江漢表遺靈

登裴秀才廸小臺作

唐王維

端居不出戶滿目望雲山落日鳥邊下秋原人外閒遙
知遠林際不見此檐間好客多乘月應門莫上關

凝雲榭晚興

宋文同

晚策倚危榭羣峰天際橫雲陰下斜谷雨勢落褻城遠
渡孤煙起前邨夕照明遙懷寄新月又見一稜生

聚仙臺夜飲

金元好問

永夜畱歡席高懷遠市塵月涼衣有露風細酒生鱗鄉
社情親舊仙臺姓字新殷勤詩卷在長記坐中人

臺上

明薛蕙

臺迥通風榭窓虛近水城卷簾殘暑去携手晚涼生碧
樹藏雲暗銀河度月明醉來愁彷彿只作畫中行

澄江臺

明王韋

混合開天塹蒼茫壯帝畿帆檣移夕景樓殿動朝輝落
日波濤隱浮煙島嶼微登臺歌古詠長憶謝玄暉

平臺

明 馬汝驥

曲臺通太乙，複道肅鈞陳。
虎旅歸營久，龍光繞禁新。
柏梁開日月，蓬閣接天人。
漢帝崇文化，賡歌奉紫宸。

秋日登雨花臺

明 陳鳳

落葉山中寺，秋風江上臺。
鳳城雙闕迥，牛渚片帆來。
繁吹暮仍急，清樽醉復開。
東籬菊尚晚，畱取盡餘盃。

五言排律

鬱孤臺

宋 蘇軾

八境見圖畫鬱孤如舊遊山為翠浪湧水作玉虹流日
麗崆峒曉風酣章貢秋丹青未變葉鱗甲欲生洲嵐氣
昏城樹灘聲入市樓煙雲侵嶺路艸木半炎州故國千
峰外高臺十日畱他年三宿處準擬繫歸舟

立春日山西紀石二使君陳程二閩帥邀遊吹

臺同張職方賦

明
朱睦㮮

驄馬尋芳出高臺野望同人皆惠連葦地即孝王宮宴
對幽林雪歌餘大國風斷垣蒼蘚合遺沼碧流通日轉

平蕪外春歸遠樹中今朝逢賦客懷古意何窮

七言律

朝臺送客有懷

唐

許渾

趙佗西拜已登壇馬援南征土宇寬越國舊無唐印綬
蠻鄉今有漢衣冠江雲帶日秋偏熱海雨隨風夏亦寒
嶺北歸人莫回首蓼花楓葉萬重灘

凌歊臺送韋秀才

許渾

雲起高臺日未沈數邨殘照半巖陰野蠶成繭桑柘盡

谿鳥引雛蒲稗深帆勢依依投極浦鐘聲杳杳隔前林
故山迢遞故人去一夜月明千里心

亭臺

唐
秦韜玉

雕楹累棟架崔嵬院宇生煙次第開為向西窻添月色
豈辭南海取花栽意將畫地成幽沼勢擬驅山近小臺
清境漸深官轉重春時長是別人來

題睦州郡中千峰榭

唐
方干

豈知平地似天台朱戶深沈別徑開曳響露蟬穿樹去

斜行沙鳥向池來
窓中早月當琴榻
牆上秋山入酒杯
何事此中如世外
緣羊祜是仙才

月波臺

宋朱子

潺潺流水注回塘
中作平臺受晚涼
四面不通車馬跡
一樽聊飲芰荷香
韓公無復吟花鳥
楚客何勞賦葑房
少待須臾更清絕
月華零露洗匡牀

登擬峴臺

宋陸游

層臺縹緲壓城闌
倚杖來觀浩蕩春
放盡尊前千里目

洗空衣上十年塵，紫迴水抱中和氣。
平遠山如醞藉人，更喜機心無復在沙邊。
鷗鷺亦相親。

妙高臺

元李思衍

危亭新構客持觴，雨浥闌干面面涼。
煙外好山供水墨，風前老樹奏笙簧。
接天淨綠秋江白，著地彤雲晚稻黃。
騷裊絲鞭歸興逸，水晶宮殿桂花香。

華素臺

元薛元曦

銀臺錯落照長春，泰宇清明絕點塵。
星斗九天分楚越。

山河萬里界甌閩花邊絳節招猿鶴雲裏丹梯駐鳳麟
戲馬歌風何足數初陽今古對天人

新秋釣魚臺讌集兼贈倪若谷秘書得中字

明

李先芳

古寺涼蟬嘒晚風釣魚臺近濯龍宮波搖樹色浮天上
山寫秋容入鏡中蓮社舊遊花落盡濠梁樂事鳥啼空
臨流不醉新豐酒笑煞滄浪把釣翁

五言絕句

奉和春日池臺

唐 元萬頃

日影飛花殿，風文積草池。
鳳樓通夜敞，虬輦望春移。

臨高臺送黎拾遺

唐 王維

相送臨高臺，川原杳何極。
日暮鳥飛還，行人去不息。

望山臺

唐 錢起

望山登春臺，目盡趣難極。
晚景下平阡，花際霞峰色。

石臺

宋 朱子

出谷轉石稜，俯身窺木末。
夕眺嵐翠分，朝躋雲海濶。

聚遠臺

金趙湏

獨上平臺上風雲萬里來青山一尊酒落日未能回

過越王臺

明僧來復

人道耶谿好青山罨畫開荷花三百里無數白鷗來

七言絕句

嚴陵釣臺

唐黃滔

終向煙霞作野夫一竿竹不換簪裾直釣猶逐熊羆起
獨是先生真釣魚

過雲臺

金李俊民

夜半風吹霽色開
曉乘殘月過雲臺
連山斷處瞰平野
一線黃流掌上來

釣臺夜興

元薩都拉

仙茶旋煮桐江水
客火遙分石壁燈
風露滿船山月上
夜涼獨對釣臺僧

御定佩文齋詠物詩選卷一百十七

欽定四庫全書

御定佩文齋詠物詩選卷一百十八

亭類

五言古

奉和登百花亭懷荆楚

梁朱超道

亭高登望極春心遠近同莫謂荆臺隱雲行不礙空柳
色浮新翠蘭心帶淺紅若因鵬舉便重上龍門中

山亭夜宴

唐王勃

桂宇幽襟積松臺涼夜永森沈野徑寒肅穆巖扉靜竹
晦南阿色荷翻北潭影清興殊未闌林端照初景

夜飲東亭

唐
宋之問

春泉鳴大壑皓月吐層岑岑壑景色佳慰我遠遊心暗
芳足幽氣驚棲多衆音高興南山曲長謠橫素琴

四月十三日詔宴寧王亭子賦得好字

唐
張說

何許承恩宴山亭風日好綠嫩鳴鶴洲陰濃鬪雞道果

思夏來茂花嫌春去早行樂無限時皇情及芳草

春遊南亭

唐
韋應物

川明氣已變巖寒雲尚擁南亭草心綠春塘泉脈動景
煦聽禽響雨餘看柳重逍遙池館華益媿專城寵

芙蓉亭

唐
柳宗元

新亭俯朱檻嘉木開芙蓉清香晨風送縵彩寒露濃瀟
灑出人世低昂多異容嘗聞色空喻造物誰為工留連
秋月宴迢遞來山鐘

郡亭

唐白居易

平旦起視事，亭午卧掩關。
除親簿領外，多在琴書前。
况有虛白亭，坐見海門山。
潮來一凭檻，賓至一開筵。
終朝對雲水，有時聽管絃。
持此聊過日，非忙亦非閒。
山林本寂寞，朝闕空喧煩。
唯茲郡閣內，囂靜得中間。

旅次洛城東水亭

唐孟郊

水竹色相洗，碧花動軒楹。
自然逍遙風，蕩滌浮競情。
霜落葉聲燥，景寒人語清。
我來招隱亭，衣上塵暫輕。

達觀亭

宋 蔡 襄

峭峻釣龍石飛亭壓其端曠徹四無際因之名達觀板
雲躋大庭仙路何紆盤秋明澄遠綠暑霽凝新寒城郭
煙火稠水陸漁樵安偶暇按民俗適遊心意歡鳴絃俯
清流對酒環蒼山重拂衣裾淨從帶石嵐還

新作春野亭

蔡 襄

太守職民治詔書勸吾農載酒事緬邈作室當廨中况
憑軒牖高中視田野功澹沲沐新澤依微生浮風江潮

漲新綠山麓延朝紅耕鋤時節動歌謠聲意通慙非佐
理才幸邁頻年豐未厭畎畝樂駕言誰相從

枕流亭

宋文同

愛此煙景佳開軒故臨水晴暉照寒浪飛影動意紙倚
檻見魚游卷簾知鴈起憔悴笑湘纍區區詠蘭芷

開先漱玉亭

宋蘇軾

高巖下赤日深谷來長風劈開青玉峽飛出兩白龍亂
沫散霜雪古潭搖清空餘流滑無聲快瀉雙石硤我來

不忍去月出飛橋東蕩蕩白銀闌沈沈水晶宮願隨琴
高生脚踏赤鯁公手持白芙蓉跳下清冷中

開先漱玉亭

宋朱子

竒哉康山陽雙劍屹對起上有橫飛雲下有瀑布水奔
騰復璀璨佳麗更雄偉勢從山梁外影落明湖裏平生
兩仙句詠歎深仰止三年落星灣悵望眼空昧今朝隨
杖屨得此弄清泚更誦玉虹篇塵襟諒昭洗

張詹事遂初亭

元趙孟頫

青山繚神京佳氣溢芳甸林亭去天咫萬狀爭自獻年
多嘉木合春晚餘花殿雕闌留戲蝶藻井語嬌燕退食
鳴玉珂友于此終宴鐘鼓樂清時衣冠集羣彥朝市塵
得侵圖書味方遠紛華雖在眼道勝安用戰初心良已
遂雅志由此見何事江海人山林未如願

題清華亭

元黃潛

名區滙修渚流望俯平陸飛雨天際來遠峰淨如沐生
香餘晚華繁陰靄嘉木秀色坐可攬終然不盈掬觸景

幽興多接物道機熟誰能與之遊
食芳飲山淥

題茶陽驛飛亭

元 陸都拉

白雲飛出山怒擘蒼峽裂幽谷濕晴雲絕壁灑飛雪萬
折入滄海龍宮水晶闕簸揚弄珠人冰簾挂寒月

松江亭

在吳江垂
虹橋上

明 高 啓

泊舟登危亭江風墮輕幘空明入遠眺天水如不隔日
落震澤浦潮來松陵驛絲絲洲溆平莽莽葭積憑欄
不敢唾下有龍窟宅帆歸雲外秋鳥下煙中夕欲炊菰

米飯待月出海白喚起弄珠君閒吹第三笛

七言古 附長短句

西亭子送李司馬

唐岑參

高高亭子郡城西直上千尺與雲齊盤崖緣壁試攀躋
羣山向下飛鳥低使君五馬天半嘶綵繩玉壺為君提
坐來一望無端倪紅花綠柳鶯亂啼千家萬井連迴谿
酒行未醉聞暮雞點筆操紙為君題為君題惜解攜草
萋萋沒馬蹄

宿東谿李十五山亭

唐 王季友

上山下山入山谷谿中落日留我宿
松石依依當主人
主人不在意亦足名花出地兩重階
絕頂平天一小齋
本意由來是山水何用相逢語舊懷

東山亭

宋 文同

朝陽之峯乃天設曲嶺長岡地盤結
下臨絕澗走縈迴
上聳危亭飛巖嶮晚雲幾處水墨畫
秋樹幾番紅綠纈
安能恰會此時閒靜與詩人吟曉雪

題黃才叔看山亭

宋 楊萬里

春山葉潤秋山瘦
雨山黯黯晴山秀
湖湘山色天下稀
零陵仍復白其眉
作亭不為俗人好
箇竹把茅吾事了
朝來看山佳有餘
為渠更盡一編書

冷泉亭

元 周 權

昔人來自天竺國
縹緲孤雲伴飛錫
天風吹落凝不去
化作竒峯聳空碧
至今裂峽餘雲髓
桂冷松香流未已
翠光圍住玉壺秋
不於晴雷度山趾
道人宴坐無生滅

炯炯層胸照冰雪夜深出定汲清泠寒猿啼斷西巖月

澄虛亭

元郭鈺

匹馬江上行且停蒼松夾道風泠泠波光倒吞落日白
雲氣下接炊煙青山僧獨行掃殘葉水鳥雙飛迴遠汀
主人邀客領竒勝賦詩把酒澄虛亭

五言律

宿羽亭侍宴應制

唐杜審言

步輦千門出離宮二月開風光新柳報宴賞落花催碧

水搖空閣青山繞吹臺聖情留晚興歌管送餘杯

都尉山亭

杜審言

紫藤紫葛茁綠刺眉薑薇下釣看魚躍探巢畏鳥飛葉
疎荷已晚枝亞果新肥勝迹都無限只應伴月歸

仙萼亭初成侍宴應制

唐沈佺期

山中氣色和宸賞第中過輦路披仙掌帷宮拂帝蘿泉
臨香澗落峰入翠雲多無異登玄圃東南望白河

春日宴宋主薄山亭

唐宋之問

公子政邀歡林亭春未闌攀巖踐苔易迷路出花難窻
覆垂楊暖堦侵瀑水寒帝城歸路直留興接鷓鴣

幸梨園亭應制

唐崔湜

年光陌上發香輦鏡中遊草綠鴛鴦殿花明翡翠樓寶
杯承露酌仙管雜風流今日陪遊豫皇恩不可酬

相州北亭

唐張說

人務南亭少煙霞北院多山花迷徑路池水拂藤蘿萍
散魚時舞林幽鳥作歌悠然白雲意乘興抱琴過

林亭作

唐張九齡

穿築非求麗幽閒欲寄情
寓懷因壞石真意在蓬瀛
苔益山文古池添竹氣清
從茲果蕭散無事亦無營

同蔡孚五亭詠

唐徐晶

章奏中京罷雲泉別業歸
拂琴鋪野席牽柳挂朝衣
翡翠巢書幌鴛鴦立釣磯
幽棲可憐處春事滿林扉

宴榮山人池亭

唐孟浩然

甲第開金穴榮期樂自多
樞嘶支道馬池養右軍鴛
竹

引攜琴入花邀載酒過山翁來取醉時唱接離歌

早秋宴張郎中海亭即事

唐 盧象

邑有絃歌宰翔鸞狎野鷗眷言華省舊暫滯海池遊
島藏深竹前谿對舞樓更間書即事雲物是新秋

陸渾水亭

唐 祖詠

晝眺伊川曲巖間霽色明淺沙平有路流水漫無聲
浴鳥沿波聚潛魚觸釣驚更憐春岸綠幽意滿前楹

題韓少府水亭

唐 祖詠

梅福幽棲處佳期不忘還
烏啼當戶竹花繞傍池
山水氣侵階冷松陰覆座閒
寧知武陵趣宛在市朝間

題崔八丈水亭

唐李白

高閣橫秀氣清幽併在君
簾飛宛谿水窻落敬亭雲
猿嘯風中斷漁歌月裏閒
閒隨白鷗去沙上自成羣

宴陶家亭子

李白

曲巷幽人宅高門大士家
池開照膽鏡林吐破顏花
綠水藏春日青軒秘晚霞
若聞絃管妙金谷不能誇

章梓州水亭

唐杜甫

城晚通雲霧亭深到芰荷
吏人橋外少秋水席邊多
近屬淮王至高門薊子過
荊州愛山簡吾醉亦長歌

重題鄭氏東亭

杜甫

華亭入翠微秋日亂清暉
危石歛山樹清漣曳水衣
紫鱗衝岸躍蒼隼護巢歸
向晚尋征路殘雲傍馬飛

過南鄰朱山人水亭

杜甫

相近竹參差相過人不知
幽花歌滿樹曲水細通池
歸

客村非遠殘樽席更移看君多道氣從此數追隨

郡南亭子宴

唐張謂

亭子春城外朱門向綠林柳枝經雨重松色帶煙深
酒迎山客穿池集水禽白雲常在眼聊足慰人心

題裴十六少卿東亭

唐李嘉祐

平津舊東閣深巷見南山卷箔嵐烟潤遮窻竹影閒
傾茶兼落帽戀客不開關斜照窺檐外川禽時往還

宴無錫蔡長官西亭

李嘉祐

茅簷閒寂寂無事覺人和井近時澆圃城低下見河興
緣芳草積情向遠峰多別日歸何地停橈更一過

題李將軍山亭

唐郭良

鳳閣將軍位龍門司隸家衣冠為隱逸山水作繁華徑
出重林草池搖兩岸花誰知貴公第亭院有煙霞

夏夜西亭即事寄錢員外

唐耿漳

高亭賓客散暑夜醉相和細汗迎衣集微涼待扇過風
還池色定月晚樹陰多遙想隨行者珊珊動曉珂

玉臺體題湖上亭

唐戎昱

湖入苑西邊湖頭勝事偏
綠竿初長筍紅顆未開蓮
蔽日高高樹迎人小小船
清風長入座夏月似秋天

題楊侍郎新亭

唐劉商

毘陵過柱史簡易在茅茨
芳草如花種修篁帶筍移
徑幽人未賞簷靜燕初窺
野客憐霜壁青松畫一枝

畫居池上亭獨吟

唐劉禹錫

日午樹陰正獨吟池上亭
靜看蜂教誨閒想鶴儀型
法

酒調神氣清琴入性靈浩然機已息几杖復何銘

百花亭

唐白居易

朱檻在空虛涼風八月初山形如峴首江色似桐廬佛
寺乘船入人家枕水居高亭仍有月今夜宿何如

湖亭晚歸

白居易

盡日湖亭卧心閒事亦稀起因殘醉醒坐待晚涼歸松
雨飄藤帽江風透葛衣柳堤行不厭沙軟絮霏霏

題胡氏谿亭

唐朱慶餘

亭與谿相近無時不有風澗松生便黑野蘚看多紅雨
足秋聲後山沈夜色中主人能守靜略與客心同

光州王建使君水亭作

唐賈島

楚水臨軒積澄鮮一畝餘柳根連岸盡荷葉出萍初極
浦清相似幽禽到不虛夕陽亭際眺槐雨滴疎疎

谿亭

唐許渾

谿亭四面山橫柳半谿灣蟬響螳螂急魚深翡翠閒水
寒留客醉月上與僧還猶戀蕭蕭竹西齋未掩關

其二

煖枕眠谿柳僧齋昨夜期
茶香秋夢後松韻晚吟時
共戲魚翻藻爭棲鳥墮枝
重陽應一醉栽菊助東籬

宿宣義池亭

唐
劉得仁

暮色遶柯亭南山出竹青
夜深斜舫月風定一池星
島嶼無人跡菰蒲有鶴翎
此中休使得何必泛滄溟

姚氏池亭

唐
項斯

池館饒佳致幽人愜所閒
篠風能動浪岸樹不遮山
嘯

檻魚驚後眠窓鶴語間何須說廬阜深處便躋攀

早秋遊湖上亭

唐劉威

危亭秋尚早野思已無窮竹葉一樽酒荷香四座風曉
煙孤嶼外歸鳥夕陽中漸愛湖光冷移舟月滿空

涵碧亭

唐方干

高低竹雜松積翠復留風路劇陰谿裏寒生暑氣中閒
雲低覆草片水靜涵空方見洋源牧心侔造化工

鄠郊山舍題趙處士林亭

唐李洞

圭峯秋後疊亂葉落寒虛四五百竿竹二三千卷書雲
深猿拾栗雨霽蟻緣蔬只隔門前水如同萬里餘

漢南郵亭

唐裴說

高閣水風清開門日送迎帆張獨鳥起樂奏大魚驚驟
雨拖山過微風拂面生閒吟雖得句留此謝多情

題王侍御宅內亭子

唐黃滔

俗間塵外境躬內宅中亭或有人家創還無蓮幕馨石
曾湖岸見琴誤嶽樓聽來客頻頻說終須作畫屏

中書相公谿亭宴集依韻

宋徐鉉

雨霽秋光晚亭虛野興迴沙鷗掠岸去谿水上階來客
傲風歌憤筵香菊在杯東山長許醉何事憶天台

碧巘亭

宋文同

斷巘綠谿邊危亭翠壁前軒窓誰是客詩酒自稱仙遠
壑春藏雨長波晝起煙吏人休報事高興正陶然

弄珠亭春望

文同

岸柳舞毵毵春濃物象酣煙雲分極浦舟楫聚回潭上

水魚千百眠沙鴈兩三遙懷無可奈長是寄城南

東谿亭

文同

短釣逶迤渡高欄天矯沈波光環堵淨日色綵梁深萍
苻翻金鯽蘭苔點翠禽主人公事簡時此照清襟

蒙亭

宋孫覲

小築三間足雄包萬象并遙波通極浦落日抱孤城小
語千巖應長歌百蟄驚坐看衣屨上漠漠晚雲生

嫣然亭

宋朱子

手種籬間樹枝繁不忍刪
新亭最佳處勝日共歡顏
景晏春紅淺雨餘寒翠潛
光風回巧笑桃李任漫山

過九里亭

宋楊萬里

水渚纔容足漁家便架椽
屋根些子地簷外不勝天
岸皆垂柳門門一釣船
五湖好風月乞與不論錢

陳伯可山亭

宋戴復古

梯險登霞外乘流過竹西
寒谿隨雨漲高閣與雲齊
雙鶴有時舞孤猿何處啼
清吟無盡興白石可留題

林皋亭

元虞集

九月天氣肅鶴鳴在林陰使君甚好客來者總能吟紅
樹秋山近黃華夕露深鄰翁八九十有酒即相尋

登山亭

元薩都拉

山上新亭好紅塵不可侵雨階幽草合風徑落花深野
水浮晴色平田下夕陰城中公事少日日就登臨

嶽心亭

元張翥

何許新亭好軒窗窈窕深天開雲四面地據嶽中心雨

綠蘿蕪道風香蒼葛林曉嵐收不盡猶作半山陰

呂公亭

元余闕

鄂渚江漢合茲亭宅其幽我來窺石鏡兼得眺芳洲遠
岫雲中沒春江雨外流何時乘白鶴吹笛過南樓

垂虹亭

元倪瓚

虛閣春城外澄湖暮雨邊飛雲忽入戶去鳥欲窮天林
屋青西映吳松碧左連登臨感時物快吸酒如川

山亭

明薛蕙

西園禁垣東涼生暑漸空小池盈宿雨叢桂易秋風獨
鶴窺雲際幽蘭浥露中來遊行樂地不惜醉山公

內苑涵碧亭

明陳沂

苑入黃金塢橋迴碧樹灣龍池觀九島鼇禁覓三山溜
轉雲車急花深月殿閒從來人罕至御榻在中間

偕方仲美宗良兄再集宛在亭

明朱多炆

一曲君恩重千秋賀監才亭虛水禽集池淨藕花開進

艇涼風送鈎簾返照來誰能與朋好到此不銜杯

五言排律

王屋山第之側雜構小亭暇日與羣公同遊

唐李嶠

桂亭依絕巘蘭榭俯迴谿綺棟魚鱗出雕甍鳳羽棲引
泉聊漲沼鑿磴且通蹊席上山花落簾前野樹低弋林
開曙景釣渚發晴霓狎水驚梁燕臨風聽楚雞復看題
柳葉彌喜蔭桐圭

白蓮花亭侍宴應制

唐沈佺期

九日陪天仗三秋幸禁林
霜威變綠樹雲氣落青岑
水殿黃花合山亭絳葉深
朱旗夾小徑寶馬駐清潯
苑吏收寒果饗人饒野禽
承歡不覺暝遙響素秋砧

仙萼池亭侍宴應制

沈佺期

步輦尋丹嶂行宮在翠微
川長看鳥滅谷轉聽猿稀
天磴扶階迴雲泉透戶飛
閒花開石竹幽葉吐薔薇
徑狹難留騎亭寒欲進衣
白龜來獻壽仙吹返彤闈

奉和幸神臯亭應制

唐 宋之問

清蹕喧黃道乘輿降紫宸
霜戈凝曉日雲管發陽春
臺古今疑漢林餘半識秦
宴酣詩布澤節改令行仁
昔恃山河險今依道德淳
多慚獻嘉頌空累屬車塵

鄭郎中山亭

唐 崔 翹

篆筆飛章暇園亭染翰遊
地竒人境別事遠俗塵收
書閣山雲起琴齋澗月留
泉清鱗影見樹密鳥聲幽
杜馥薰梅雨荷香送麥秋
無勞置驛騎文酒暗相求

題獨孤使君湖上林亭

唐劉長卿

出樹倚朱欄，吹鏡引上官。
老農持插拜，時稼捲簾看。
水對登龍淨，山當建隼寒。
夕陽湖草動，秋色渚田寬。
渤海人無事，荊州客獨安。
謝公何足比，來往石門難。

裴僕射東亭

唐錢起

鳳宸任匡濟，雲谿難退還。
致君超列辟，得道在榮班。
朱戟繚垣下，高齋芳樹間。
隔花聞遠水，廢卷愛晴山。
晚沐值清興，知音同解顏。
藉蘭開賜酒，留客下重關。
仙夫逐

人靜朝車映竹閒則知真隱逸未必謝區寰軒后三朝
顧赤松何足攀

杭州盧錄事山亭

唐朱慶餘

山色滿公署到來詩景饒解衣臨曲榭隔竹見紅蕉清
漏焚香夕輕嵐視事朝靜中看鎖印高處見迎潮曳履
庭蕪近當身樹葉飄傍城餘菊在步入一仙瓢

李氏小池亭十二韻

唐韋莊

積石亂巉巉庭莎綠不芟小橋低跨水危檻半依巖花

落魚爭唼櫻紅鳥競鷓引泉疏地脈掃絮積山嵌古柳
紅綃織新篁紫綺緘養猿秋嘯月放鶴夜棲杉枕簟谿
雲膩池塘海雨鹹語窻雞逞辨舐鼎犬偏饒踏蘚青粘
屐攀蘿綠蔭衫訪僧舟北渡貫酒日西銜遲客登高閣
題詩遶翠岵家藏何所寶清韻滿琅函

泉南孫氏園亭

元馬祖常

鑿石通歸汐浮梁看浴暎鴨闌萍上瓷鹿柵蘚生垣蒼
荀垂梔子篔簹長竹孫書香共辟燼席煖錦裁鴛交客

登仙籍承家荷帝恩
冰甌蜂蜜溜酒榼
荔漿翻吹簫花
圍屋彈琴鶴舞園
海雲春有態
閩雪夜無痕
誰謂衣裳
懶予今杖履煩
將鬚歌月地
翹首望天門

七言律

太平公主山亭侍宴應制

唐李嶠

黃金瑞榜絳河隈
白玉仙輿紫禁來
碧樹青岑雲外聳
朱樓畫壁水中開
龍舟下瞰鮫人室
羽節高臨鳳女臺
遽惜歡娛歌吹晚
揮戈更却曜靈回

題賈巡官林亭

唐楊巨源

白鳥閒棲亭樹枝，綠樽仍對菊花籬。
許詢本愛交禪侶，陳寔由來足好兒。
明月出雲秋館思，遠泉經雨夜窓知。
門前長者無虛轍，一片寒光動水池。

題友人池亭

唐溫庭筠

月榭風亭遠曲池，粉垣迴互瓦參差。
侵簾白片搖翻影，落鏡紅愁寫倒枝。
鷓鴣刷毛花蕩漾，鷺鷥拳足雪離披。
山翁醉後如相憶，羽扇清樽我自知。

奉同諸公題河中任中丞新朔河亭

唐
李商隱

萬里誰能訪十洲
新亭雲構壓中流
河鮫縱翫難為室
海蜃遙驚恥化樓
左右名山窮遠目
東西大道鎖輕舟
獨留巧思傳千古
長與蒲津作勝遊

許州題德星亭

唐
薛能

潁水南流東有堤
堤邊亭是武陵谿
槎松配石堪僧坐
藥杏含春欲鳥啼
高處月生滄海外
遠郊山在夕陽西

頻來不似軍從事只戴紗巾曳杖藜

題河中亭子

薛能

河擘雙流島在中島中亭子正南空蒲根舊浸臨關道
沙色遙飛傍苑風晴見樹早知嶽大晚聞車亂覺橋通
無窮勝事應須宿霜白蒹葭月在東

和于中丞登扶風亭

唐方干

避石攀蘿去不迷行時舉步似丹梯東軒海日已先照
下界晨雞猶未啼郭裏雲山全占寺村前竹樹半藏谿

謝公吟望多來此此地應將峴首齊

再題路支使南亭

方干

行處避松兼礙石即須門徑落斜開愛邀舊友看漁釣
貪聽新禽駐酒杯樹影不隨明月去谿流常送落花來
睡時分得江淹夢五色毫端弄逸才

睦州呂郎中環谿亭

方干

為是仙才登望處風光便似武陵春閒花半落猶迷蝶
白鳥雙飛不避人樹影斜餘侵枕簟荷香坐久著衣巾

暫來此地非多日，明主那容借寇恂。

題越州袁秀才林亭

方干

清邃林亭指畫開，幽巖別派象天台。
坐牽蕉葉題詩句，醉觸藤花落酒杯。
白鳥不歸山裏去，紅鱗多向鏡中來。
終年此地為吟侶，早起尋君薄暮回。

褚家林亭

唐皮日休

廣庭遙帶舊娃宮，竹島蘿谿委曲通。
茂苑樓臺低檻外，太湖魚鳥徹池中。
蕭疎桂影移茶具，狼籍蘋花上釣筒。

爭得共君來此住便披鶴氅對清風

題崔駙馬林亭

唐僧無可

宮花野藥半相和藤蔓參差惜不科
纖草連門留徑細高樓出樹見山多
洞中避暑青苔滿池上吟詩白鳥過
更買太湖千片石疊成雲頂綠嵯峨

登涵輝亭

宋孔武仲

常時洲島隔波瀾故覓君山直上看
罨畫園林春減色水晶宮闕晝添寒
州城斜引羣峰小湖面平吞數驛寬

坐久西風響喬木扁舟思到武陵灘

太湖恬亭

宋 王安石

檻臨谿上綠陰圍谿岸高低入翠微日落斷橋人獨立
水銜幽樹鳥相依清遊自覺心無累靜處安知世有機
更待夜深同徙倚秋風斜月釣船歸

成都揚氏江亭

宋 文同

汀洲煙雨卷輕霏遙望軒窗隱翠圍萬嶺西來供曉色
一江南下載晴暉鳧鷖慣入闌干宿魚蟹長隨舴艋歸

我亦舊多滄海思幾時如此得苔磯

題潭州徐氏春暉亭

宋蘇軾

曨曨曉日上三竿客向東風競倚闌穿竹鳥聲驚步武
入簷花影落杯盤勿嫌步月臨元圃冷笑乘槎向海灘
勝槩直應吟不盡憑君寄與畫圖看

秋日登海州乘槎亭

張耒

海上西風八月涼乘槎亭外水茫茫人家日暖漁樵樂
山路秋晴松柏香隔水飛來鴻陣濶趁潮歸去櫓聲忙

蓬萊方丈知何處煙浪參差在夕陽

次秀野極目亭韻

宋朱子

偶向新亭一破顏高情直寄有無間地偏已隔東西路
天闊長圍遠近山浩蕩祇愁朝霧合輪困却喜暮雲還
不堪景物撩人甚倒盡詩囊未許慳

飲清湍亭石上小醉再登晝寒朱子

水邊今日共傳杯多謝殷勤數子來三伏炎蒸那有此
百年懷抱頓能開雲山合匝還生霧雪澗翻騰怒吼雷

却恨蒼屏遮遠目，凌風直欲跨蓬萊。

題張氏新亭

宋 范成大

水揚成幄翠相遮，猶有東風管物華。
葉底青梅無數子，梢頭紅杏不多花。
煩將練火炊香飯，更引長泉煮鬪茶。
約我詩成須疥壁，莫嗔歌側似歸鴉。

水亭有懷

宋 陸 游

漁村把酒對丹楓，水驛憑軒送去鴻。
道路半年行不到，江山萬里看無窮。
故人草詔九天上，老子題詩三峽中。

笑謂毛錐可無恨書生處處與卿同

池亭夏晝

陸游

造物寧非念老生池亭幽事悉施行
羣魚聚散忽無迹孤蝶去來如有情
小磴落茶紛雪片寒泉得火作松聲
曲肱假寐脩然寤不為敲門夢不成

南海東廟浴日亭

宋楊萬里

南海端為四海魁扶桑絕境信竒哉
日從若木梢頭轉潮到占城國裏回
最愛五更紅浪沸忽吹萬里紫霞開

天公管領詩人眼銀漢星槎借一來

寄題曾子與競秀亭

楊萬里

老夫上下蓼花灘每過君家輒繫船尊酒燈前山入座
孤鴻月底水連天暄涼書問二千里場屋聲名三十年
競秀主人文似豹不應霧隱萬峰邊

平遠亭

元 尹廷高

野水漫漫接白雲凭闌轉覺興撩人一川芳草青無際
數點遙峰淡不真煙樹夕陽開畫軸風帆沙鳥伴吟身

箇中儘有閒田地何必桃源更問津

半山亭

元
于石

萬疊嵐光冷滴衣
清泉白石鎖煙扉
半山落日樵相語
一徑寒松僧獨歸
葉落誤驚幽鳥去
林空不礙斷雲飛
層崖峭壁疑無路
忽有鐘聲出翠微

分題翠光亭送李仲常江陰知事

元
陳樵

亭前練水細如縈
亭上君山玉作屏
林斷纜通吳月白

鴈飛不盡楚天青
莓苔著雨長黏石
翡翠迎風欲墮翎
怪得步兵迷望眼
詩成正值酒初醒

題張以中野亭

元倪瓚

人境曠無車馬雜
軒楹只在第三橋
開門草色侵書幌
隔水松聲和玉簫
一榻雲山供夏簟
滿江煙雨看春潮
君能擷取飛霞珮
天際真人近可招

題崇山劉氏園亭

明吳會

西山三疊鬱岩堯
亭上看山翠欲飄
楊柳小樓風滿席

芙蓉清沼水平橋美人歌處傾金杓
仙客來時度玉簫
我欲醉眠花底月滿衣香露夜蕭蕭

方叔先生過詠歸亭

明沈右

積雨空林喜夜晴杖藜隨意傍江行
天寒木落青山出
日轉沙虛白鳥明漫擬東鄰時釀黍
自憐南畝晚歸耕
潁川高士能相過閒把瑤琴膝上橫

坐王氏園亭作

明劉滢嗣

秋向郊原靜處尋古牆圍繞華門深
迂迴窈窕層苔路

青紫丹黃千樹林風定小池開竹影日中高榭合藤陰
孤琴更在西鄰北遙領清商識隱心

題來青亭

明僧德祥

西馬橋分一水灣來青亭子在其間一方席上長留客
三尺窓中只見山落地浮雲須急掃當簷繁木要頻刪
輕嵐嫩紫無朝暮肯與閒情數往還

七言排律

顧氏綠陰亭

元鄭元祐

顧家亭子綠陰陰
楊柳菰蒲岸深鷺
下積陂明霽雪
鷺啼叢薄度鎔金
涼雲覆地苔粘屐
疎雨沾衣露滿襟
境曠始知清晝寂
舟行忽見白漚沈
錦香承宇花如霧
星采當階月在林
荷鑿課童裁藥物
開窻傍水候足音
湛癡原自能談易
秘鍛何妨善鼓琴
况是松醪釀初熟
公餘莫厭客同斟

五言絕句

池西亭

唐
白居易

朱欄映晚樹金魄落秋池
還似錢塘夜西樓月出時

陪江州李使君重陽宴百花亭

唐

朱慶餘

閒攜九日酒共到百花亭
醉裏求詩境回看島嶼青

迎風亭

唐

朱景元

山雨留青氣谿颺送早涼
時迴石門步階下碧雲光

蓮亭

朱景元

迴塘最幽處拍水小亭開
莫怪闌干濕鷓鴣夜宿來

望湘亭

唐鄭谷

湘水似伊水
湘人非故人
登臨獨無語
風柳自搖春

曹亭

宋孔平仲

外看江水長
裏見荷花發
廬阜收白雲
南浦浸明月

其二

漾舟荷花裏
艤棹綠楊陰
却上曹亭望
山高江水深

披錦亭

宋文同

繁紅層若雲
密綠疊如浪
青帝下尋春
滿園開步障

露香亭

文同

宿露濛濛花婀娜清香發隨風入懷袖累日不消歇

秀聚亭

宋陳瓘

曉色春風裏維舟一小亭看山渾不倦待得雪峰青

卷雲亭

宋朱子

西山雲氣深徙倚一舒嘯浩蕩忽寥開為君展遐眺

君子亭

朱子

倚杖臨寒水披襟立晚風相逢數君子為我說濂翁

春露亭書

元劉因

老樹含春容寒泉動幽響念彼山中人風露恣清賞

寄題真定明遠亭

元趙孟頫

未到新亭上先題明遠詩雲間歸鴈小山外夕陽遲

煙波亭

明吳琳

漢水連天澗江雲護曉寒青山數點最好倚闌看

歸雲亭

明蔡羽

尋幽坐翠微嵐氣濕人衣日暮高亭上雲歸僧未歸

冷泉亭

明 王穉登

暮瀑浮花急，春流飲鹿渾。
潺湲一片雨，終日在山門。

七言絕句

過崔處士興宗林亭

唐 王維

綠樹重陰蓋四鄰，青苔日厚自無塵。
科頭箕踞長松下，白眼看他世上人。

虢州後亭送李判官使赴晉絳

唐 岑參

西原驛路挂城頭
客散紅亭雨未收
君去試看汾水上
白雲猶似漢時秋

西亭春望

唐賈至

日長風暖柳青青
北鴈歸飛入杳冥
岳陽城上聞吹笛
能使春心滿洞庭

楊家南亭

唐白居易

小亭門向月斜開
滿地涼風滿地苔
此院好彈秋思處
終須一夜抱琴來

宿府池西亭

白居易

池上平橋橋下亭夜深睡覺上橋行
白頭老尹重來宿
十五年前舊月明

高亭

白居易

亭眷太高君莫拆東家留取當西山
好看落日斜銜處
一片春嵐映半環

宿竇使君莊水亭

白居易

使君何在在江東池柳初黃杏欲紅
有興即來閒便宿

不知誰是主人翁

遊城東王駙馬亭

唐陸暢

城外無塵水間松
秋天木落見山容
共尋蕭史江亭去
一望終南紫閣峰

題候仙亭

唐沈亞之

新剏仙亭覆石壇
雕梁峻宇入雲端
嶺北嘯猿高枕聽
湖南山色捲簾看

登望雲亭招友

唐朱慶餘

日日恐無雲可望不辭逐靜望來頻共知亭下眠雲遠
解到上頭能幾人

宿村家亭子

唐賈島

牀頭枕是谿中石井底泉通竹下池宿客未眠過夜半
獨聞山雨到來時

題池州貴池亭

唐杜牧

勢比凌歊宋武臺分明百里遠帆開蜀江雪浪西江滿
強半春寒去却來

題元處士高亭

杜牧

水接西江天外聲，小齋松影拂雲平。
何人教我吹長笛，閒倚春風弄月明。

題隱霧亭

唐魚玄機

春花秋月入詩篇，白日幽閒是散仙。
空捲珠簾不曾下，長移一榻對山眠。

玉泉亭

宋趙抃

潺潺朝暮入神清，落澗通池遠郡廳。
亂石長松山十里

探源須上玉泉亭

易從師山亭

宋林逋

林表秋山白鳥飛
此中幽致亦還稀
西邨渡口人煙晚
坐見漁舟兩兩歸

登賀園高亭

宋孔平仲

東武名園數賀家
更於高處望春華
深紅淺白知多少
直到南山盡是花

和杜孝錫展江亭

宋韓維

斜日低雲動水光
偶尋佳處閱羣芳
城闌不隔和風度
吹過千花百草香

谿光亭

宋蘇軾

決去湖波尚有情
却隨初日動簷楹
谿光自古無人畫
憑仗新詩與寫成

題趙秀才壁

宋陳造

日日危亭凭曲闌
幾山蒼翠擁煙鬟
連朝策馬衝雲去
盡是亭中望處山

再題吳公濟風泉亭

宋朱子

華林翠澗響風泉
竟日閒來石上眠
更結危亭俯幽聽
未妨長作地行仙

拄笏亭晚望

宋范成大

林泉隨處有清涼
山繞闌干客自忙
谿雨不飛虹尚飲
亂蟬高柳滿斜陽

雲間湖光亭

范成大

微風不動斂濤湍
組練晶晶色界寒
斜照發揮猶未盡

月明殘夜更來看

雨中山行至松風亭忽澄霽

宋 陸游

煙雨千峰擁髻鬟
忽看青嶂白雲間
卷藏破墨營丘筆
却展將軍著色山

登多稼亭曉望

宋 楊萬里

風不能消曉霧痕
天猶未放宿雲根
城腰摺處纔三徑
山觜前頭別一村

中和館後草亭

金 李晏

藤花滿地香仍在松影拂雲寒不收
山鳥似嫌遊客到一聲啼破小亭幽

過濟源登裴公亭用閒閒老人韻

元 耶律楚材

山接晴霄水浸空山光灑灑水溶溶
風迴一鏡抹監淺雨過千峰潑黛濃

其二

掀髯坐語閒臨水仰面徐行飽看山
竹裏忽聞春雪落

天教著我畫圖間

宿浚儀公湖亭

元楊載

夜宿湖亭水氣涼四更風露濕衣裳空濛霧重前山暗
屋角斜明是月光

題番陽方氏心遠亭

元黃清老

柴門垂柳曉啼鴉露徑苔封芍藥芽分得番陽雲一半
自携春雨種黃花

劉氏水南亭子

明蔣山卿

洛水橋南學士家青林遙對碧山斜春風細雨柴門閉
一樹鶯啼杏子花

小亭即事

明 李先芳

綠楊垂穗噪新鴉竹裏茅亭一徑斜不是山人攜酒至
小園閒煞碧桃花

望湖亭

明 王穉登

亭邊楊柳水邊花落日行人正憶家不及江南湖上寺
木蘭舟裏載琵琶

秋亭

明
僧德祥

十日陰雲雨未收
山中新漲足谿流
杖藜不到閒亭上
恐有秋聲在樹頭

立玉亭

僧法聚

山當崖斷孤亭立
竹樹迴環翠萬層
倒看夕陽深澗底
不知雲外有歸僧



御定佩文齋詠物詩選卷一百十八

欽定四庫全書

集部

御定佩文齋詠物詩選卷百十九至二十一

詳校官侍郎_臣李封

主事銜_臣徐以坤覆勘

總校官檢討_臣何思鈞

校對官中書_臣楊世綸

謄錄監生_臣顧永涵

欽定四庫全書

御定佩文齋詠物詩選卷一百十九

樓類

五言古

登景陽樓

宋文帝

崇堂臨萬雉層樓跨九成
瑤軒籠翠幌組幕翳雲屏
階上曉露潔林下夕風清
蔓藻環綠葉芳蘭楣紫莖
極望周天險留察決神京
交渠紛綺錯列植發華英

奉和登北顧樓

梁簡文帝

春陵佳麗地濟水鳳皇宮况此徐方域川嶽邁周豐
皇情愛歷覽遊陟擬崆峒聊驅式道候無勞襄野童
霧崖開早日晴天歇晚虹去帆入雲裏遙星出海中

水中樓影

簡文帝

水底呆魚出萍間反宇浮風生色不壞浪去影恒留

和晉安王薄晚逐涼北樓回望應教

梁庾肩吾

向夕紛喧屏追涼飛觀中樹影臨城日窗含度水風遙
天如接岸遠帆似凌空陪文慚宋玉徒等侍蘭宮

和晚日登樓

梁劉緩

所以登臺榭正重接煙霞長絲觸欄斷歸鳥避窗斜俯
巢窺暝宿臨樹摘高花百雉時方晚九層光尚賒

詠水中樓影

梁王臺卿

飄飄似雲度亭亭如蓋浮熟看波不動還是映高樓

初春登樓即目觀作述懷

唐太宗

憑軒俯蘭閣，眺矚散靈襟。
綺峰含翠霧，照日蘂紅林。
鏤丹霞錦岫，殘素雪斑岑。
拂浪隄垂柳，嬌花烏續吟。
連甍豈一拱，衆幹如千尋。
明非獨材力，終藉棟梁深。
彌懷矜樂志，更懼戒盈心。
愧制勞居逸，方規十產金。

奉和登陝州城樓應制

唐

許敬宗

挹河澄綠宇，御溝映朱宮。
辰旂翻麗景，星蓋曳雕虹。
學顰齊柳嫩，妍笑發春叢。
錦鱗文碧浪，繡羽絢青空。
春念三階靜，遐想二南風。

奉和聖製登蒲州逍遙樓應制

唐蘇頲

在昔堯舜禹遺塵成典謨聖皇東巡狩况乃經此都樓
觀紛迤邐河山幾縈紆緬懷祖宗業相繼文武圖尚德
既無險觀風諒有孚豈如汾水上簫鼓事遊娛

題陸山人樓

唐儲光羲

暮聲雜初鴈夜色涵早秋獨見海中月照君池上樓山
雲拂高棟天漢入雲流不惜朝光滿其如千里遊

登錦城散花樓

唐李白

日照錦城頭朝光散花樓
金窗夾繡戶珠箔懸瓊鉤
飛梯綠雲中極目散我憂
暮雨向三峽春江繞雙流
今來一登望如上九天遊

遊平泉宴浥澗宿香山石樓贈坐客

唐白居易

逸少集蘭亭季倫宴金谷
金谷太繁華蘭亭闌絲竹
何如今日會浥澗平泉曲
杯酒與管絃貧中隨分足
紫鮮

林筍嫩紅潤園桃熟採摘助盤筵芳滋盈口腹閒吟暮
雲碧醉藉春草綠舞妙艷流風歌清叩寒玉古詩惜畫
短勸我今秉燭是夜勿言歸相攜石樓宿

登谿山第一樓有懷倪元鎮

明

陳汝言

清晨獨倚樓秋色淨如洗山青雲弄姿江白風初起心
隨沙鳥閒目送征帆駛對景每懷人相看隔千里

七言古

山陰縣西樓

唐

孫逖

都邑西樓芳樹間
逶迤霽色遶江山
海月夜從公署出
江雲晚對訟庭還
誰知春色朝朝好
二月飛花滿江草
一見湖邊楊柳風
遙憶青青洛陽道

郢城西樓吟

唐
郎士元

連山盡處水縈迴
山上戍門臨水開
朱欄直下一百丈
日暖游鱗自相向
昔人愛險閉層城
今人愛閒江復清
沙洲楓岸無來客
草綠花紅山鳥鳴

寓居合江樓

宋
蘇軾

海上蔥龍氣佳哉二江合處朱樓開蓬萊方丈應不遠
肯為蘇子浮江來江風初涼睡正美樓上啼鴉呼我起
我今身世兩相違西流白日東流水樓中老人日清新
天上豈有癡仙人三山咫尺不歸去一杯付與羅浮春

黃氏容安樓

元 郭 鈺

君家高樓高百尺樓間把酒無虛日極目欲窮千里心
誰謂區區僅容膝捲簾半空雲氣入孤鶴長鳴楚天碧
醉拍闌干呼月來萬壑松風夜吹笛天上玉京十二樓

羣仙不帶人間愁
曉飛霞珮來相訪
攜我共作丹丘遊
今日之日君我留
為君題詩樓上頭
笑指樓前大江水
古今人物共風流

城南樓

元

僧惟則

城南樹尾花風晴
城南樹下漁舟行
隔谿竹屋數家酒
矮籬路轉人縱橫
仙山石洞在眼底
塔竿倒影滄波明
相期待渡日已晚
坐看平野青煙生

五言律

奉和御製登鴛鴦樓卽目應制

唐
孫逖

玉輦下離宮瓊樓上半空
方巡五年狩更闢四門聰
井邑觀秦野山河念禹功
停鑿畱睿作軒檻起南風

登河北城樓作

唐
王維

井邑傳巖上客亭雲霧間
高城眺落日極浦映蒼山
岸火孤舟宿漁家夕鳥還
寂寥天地暮心與廣川閒

與杭州薛司戶登樟亭樓作

唐
孟浩然

水樓一登眺半出青林高
帟幕英寮敞芳筵下客叨
山藏伯禹穴城壓伍胥濤
今日觀溟漲垂綸欲釣鰲

題金城臨河驛樓

唐岑參

古戍依重險高樓見五涼
山根盤驛道河水浸城牆
庭樹巢鸚鵡園花隱麝香
忽如江浦上憶作捕漁郎

秋登宣城謝朓北樓

唐李白

江城如畫裏山曉望晴空
兩水夾明鏡雙橋落彩虹
人煙寒橘柚秋色老梧桐
誰念北樓上臨風懷謝公

與夏十二登岳陽樓

李白

樓觀岳陽盡川向洞庭開
鴈引愁心去山銜好月來
雲間連下榻天上接行杯
醉後涼風起吹人舞袖迴

登兗州城樓

唐杜甫

東郡趨庭日南樓縱目初
浮雲連海岱平野入青徐
孤嶂秦碑在荒城魯殿餘
從來多古意臨眺獨躊躇

題新津北橋樓得郊字

杜甫

望極春城上開筵近鳥巢
白花簷外朶青柳檻前梢
池

水觀為政廚煙覺遠庖西川供客眼惟有此江郊

白帝城樓

杜甫

江度寒山閣城高絕塞樓翠屏宜晚對白谷會深遊
急能鳴鴈輕輕不下鷗夷陵春色起漸擬放扁舟

和樊潤州秋日登城樓

唐皇甫冉

露冕臨平楚寒城帶早霜時同借河內人是卧淮陽
積水澄天塹連山入帝鄉因高欲見下非是愛秋光

奉陪渾侍中五日登白鶴樓

唐盧綸

高樓倚玉梯朱檻與雲齊
顧盼臨霄漢談諧息鼓鞀
洪河迴更直野雨急仍低
今日陪樽俎還應醉似泥

奉陪段相公晚夏登張儀樓

唐姚向

秦相架羣材登臨契上台
查從銀漢落江自雪山來
儷曲親流火凌風洽小杯
帝鄉如在目欲下盡徘徊

晚夏登張儀樓

唐姚康

登覽值晴開詩從野思來
蜀川新草木秦日舊樓臺
池影搖中座山光接上台
近秋宜晚景極目斷浮埃

同薛侍御登黎陽縣樓眺黃河

唐
楊巨源

倚檻恣流目高城臨大川
九回紆白浪一半在青天氣
肅晴空外光翻曉日邊
開襟值佳景懷抱更悠然

江樓偶宴贈同座

唐
白居易

南浦閒行罷西樓小宴時
望湖凭檻久待月放杯遲
江果嘗盧橘山歌聽竹枝
相逢且同樂何必舊相知

嘉州驛樓晚望

唐
姚鵠

樓壓寒江上開簾對翠微斜陽諸嶺暮古渡一僧歸窗
迴雲衝起汀遙鳥背飛誰言坐多倦目極自忘機

長沙陪裴大夫登北樓

唐李羣玉

巖嶂隨高步琴樽奉勝遊金風吹綠簟湖水入朱樓朗
抱雲開月高情鶴見秋登臨多暇日非為賦消憂

題樟亭驛樓

唐喻坦之

危檻倚山城風帆檻外行日生滄海赤潮落浙江清秋
晚遙峰出沙乾細草平西陵煙樹色長見伍員情

和于興宗守綿州登越王樓以詩寄朝士

唐
王鐸

謝朓題詩處危樓壓郡城
雨餘江水碧雲斷雪山明
錦繡來仙境風光入帝京
恨無青玉案何以報高情

岳陽樓

唐
江為

倚樓高望極展轉念前途
晚葉紅殘楚秋江碧入吳
雲中來鴈急天末去帆孤
明月誰同我悠悠上帝都

彭城南樓

宋
文同

百尺壓城端，飛簷欲上搏。
湖光搖埤堦，山影轉闌干。
秀野含春煦，喬林擁暮寒。
回頭大岷雪，千仞玉巔巔。

夏曼卿作新樓扁曰瀟湘片景

宋戴昂

有此一樓足，悠然萬慮忘。
拓開風月地，壓斷水雲鄉。
四野畱春色，千峰照夕陽。
眼前無限景，何處認瀟湘。

建昌胡氏小有樓

元陳旅

窈窕麻姑宅，登臨憶謝公。
近聞好山色，多在小樓中。
屋

曙丹霞吐城深翠雨通石池正當戶人立藕花風

漢江城樓

明
李言恭

樓閣依山出城高逼太空帆檣入煙霧波浪過簾櫳燈
火深林裏星河流水中人家半漁者蓑笠挂秋風

夕佳樓

明
姚旅

託意眺西嶺嵐陰過水濃煙能添晚翠霞亦勝朝容客
散樓頭月人閒野水鐘於茲遠塵侶倦鳥每相從

五言排律

登瀛洲南城樓寄遠

唐沈佺期

層城起麗譙，憑覽出重霄。
茲地多形勝，中天宛寂寥。
四榮摩鸛鶴，百拱厲風飈。
北際燕王館，東連秦帝橋。
晴光七郡滿，春色兩河遙。
傲睨非吾土，躊躇適遠鷺。
離居欲有贈，春草寄長謠。

登臨沮樓

唐張九齡

高深不可厭，巡屬復來過。
本與衆山絕，况茲韶景和。
危樓入水倒，飛楹向空摩。
雜樹緣青壁，膠枝挂綠蘿。
潭清

能徹底魚樂好跳波有象言難具無端思轉多同懷不
在此孤賞欲如何

新成甲仗樓

唐
張籍

謝氏起新樓西臨城角頭圓功百尺麗藏器五兵脩結
締椽甍固虛明戶楹周魚龍卷旗幟霜雪積戈矛暑雨
熇蒸隔涼風宴位畱地高形出沒山靜氣清幽睥睨斜
光徹欄干宿靄浮芊芊秔稻色脈脈宛谿流郡化王丞
相詩情沈隱侯居茲良得意殊勝峴山遊

分題蕃宣樓送山僉憲之閩

元 吳師道

大府開閩土危樓鎮海涯
飛雲浮畫棟麗日照高牙
昔駐蕃侯馬今迎使者車
三山歸指顧萬井仰光華
縹緲臨城處逍遙散吏衙
榕陰千樹翠荔子半空霞
嶺嶠俱清謐賓僚亦靜嘉
宣風問民俗作屏扞王家
去去青冥樾依依紫禁花
登高應有賦畱待碧籠紗

七言律

登安陽城樓

唐 孟浩然

縣城南面漢江流江嶂開成南雍州才子乘春來騁望
羣公暇日坐銷憂樓臺晚映青山郭羅綺晴嬌綠水洲
向夕波搖明月動更疑神女弄珠遊

七月一日題終明府水樓

唐
杜甫

高棟層軒已自涼秋風比日灑衣裳
脩然欲下陰山雪
不去非無漢署香
絕壁過雲開錦繡
疎松隔水奏笙簧
看君宜著王喬履
真賜還疑出尚方

江陵節度使陽城郡王新樓成王請嚴侍御判

官賦七字句同作

杜甫

樓上炎天冰雪生
高飛燕雀賀新成
碧窗宿霧濛濛濕
朱拱浮雲細細輕
仗鉞褰帷瞻具美
投壺散帙有餘清
自公多暇延叅佐
江漢風流萬古情

又作此奉衛王

杜甫

西北樓成雄楚都
遠開山嶽散江湖
二儀清濁還高下
三伏炎蒸定有無
推轂幾年惟靜曳
裾終日盛文儒
白頭受簡馬能賦
媿似相如為大夫

五鳳樓晚望

唐白居易

晴陽晚照濕煙銷
五鳳樓高天次寥
野綠全經朝雨洗
林紅半被暮雲燒
龍門翠黛眉相對
伊水黃金線一條
自入秋來風景好
就中最好是今朝

庾樓曉望

白居易

獨憑朱檻立凌晨
山色初明水色新
竹霧曉籠銜嶺月
蘋風暖送過江春
子城陰處猶殘雪
衙鼓聲前未有塵
三百年來庾樓上
曾經多少望鄉人

題岳陽樓

白居易

岳陽城下水漫漫，獨上危樓凭曲欄。
春岸綠時連夢澤，夕波紅處近長安。
猿攀樹立啼何苦，鴈點湖飛渡亦難。
此地惟堪畫圖障，華堂張與貴人看。

過襄陽樓呈上府主嚴司空樓在江陵節度使

宅北隅

唐
元稹

襄陽樓下樹陰成，荷葉如錢水面平。
拂水柳花千萬點，隔林鶯舌兩三聲。
有時水畔看雲立，每日樓前信馬行。

早晚暫教王粲上庾公應待月華明

春早郡樓書事寄呈府中羣公

唐許渾

兩鬢垂絲髮半霜石城孤夢繞襄陽
鴛鴻幕裏蓮披檻
虎豹營中柳拂牆
畫舸欲行春水急
翠簾初捲暮山長
峴亭風起花千片
流入南湖盡日香

和剡縣陳明府登縣樓

唐方干

郭裏人家如掌上
簷前樹木映窗櫺
烟霞自接天台地

分野應侵婺女星
驛路古今通
北闕仙谿日夜入
東溟綵衣才子多吟嘯
公退時時見畫屏

尚書新創敵樓

方干

異境永為歡樂地
歌鐘夜夜復年年
平明旭日生牀底
薄暮殘霞落酒邊
雖向檻前窺下界
不知窗裏是中天
直須分付丹青手
畫出旌幢遶謫仙

太保中書令軍前新樓

唐吳融

十二闌干壓錦城
半空人語落灘聲
風流近接平津閣

氣色高含細柳營盡日捲簾江草綠有時欹枕雪峰晴
不知奉詔朝天後誰此登臨看月明

秋日登臨越王樓

唐李渥

越王曾牧劔南州因向城隅建此樓橫玉遠開千嶠雪
暗雷下聽一江流畫簷先弄朝陽色朱檻低臨衆木秋
徒學仲宣聊四望且將詩賦好依劉

煙雨樓

宋鄭俠

仙人居處即鼇宮更作層樓峭倚空羣岫西來煙漠漠

大江南去雨濛濛
花鑣柳策熙怡裏
耘笠漁簑笑語中
別有夜楹千里月
憑闌清興與誰同

望海樓

宋
米芾

雲間鐵甕近青天
縹緲飛樓百尺連
三峽江聲流筆底
六朝帆影落樽前
幾番畫角催紅日
無事滄洲起白煙
忽憶賞心何處是
春風秋月兩茫然

望湖樓晚眺

宋
楊時

斜日侵簾上
玉鈎簷花飛動錦文浮
湖光寫出千峰秀

天影融成十里秋，翠鷗翻飛窺淺水。
片雲隨意入滄洲，留連更待東窗月。
注目晴空獨倚樓。

鄂州南樓

宋

范成大

誰將玉笛弄中秋，黃鶴飛來識舊遊。
漢樹有情橫北渚，蜀江無語抱南樓。
燭天燈火三更市，搖月旌旗萬里舟。
却笑鱸江垂釣手，武昌魚好便淹留。

晚登木瀆小樓

范成大

萬象當樓黼黻張，欄干一曲立蒼茫。
雲堆不動山深碧。

星出無多月淡黃宿鳥盡時猶數點歸鴻驚處更斜行
松陵正有鱸魚上安得長竿坐釣航

宴西樓

宋陸游

西樓遺跡尚豪雄錦繡笙簫在半空萬里因循成久客
一年容易又秋風燭光低映珠簾麗酒暈徐添玉頰紅
歸路迎涼更堪愛摩訶池上月方中

黃鶴樓

宋游侶

長江巨浪拍天浮城郭相望萬景收漢水北吞雲夢入

蜀江西帶洞庭流
角聲交送千家月
帆影中分兩岸秋
黃鶴樓高人不見
却隨鸚鵡過汀洲

陳待制湖樓

宋趙師秀

何處飛來縹緲中人
間惟有畫圖同
兩層簾幕垂無地
一片笙簫起半空
巖竹倒添秋水碧
渚蓮平接夕陽紅
遊人未達蒙莊旨
虛倚闌干面面通

王元仲海岳樓同諸公賦

金王琦

十二朱闌倚半空
元龍高臥定誰雄
簷楹翠濕蓬山雨

枕簟涼生弱水風物色橫陳詩卷裏雲濤飛動酒杯中
謫仙會有騎鯨便八極神遊路可通

煙雨樓

明 葛一龍

煙雨樓頭春乍晴鴛鴦湖上鳥嚶嚶中浮片席空三面
斜抱千家截半城漁網曬來風柳變酒船搖出浪花生
夕陽慣照憑闌客一抹遙山鏡裏明

七言排律

重題別東樓

唐 白居易

東樓勝事我偏知，氣象多隨昏旦移。
湖捲衣裳白重疊，山張屏障綠參差。
海仙樓閣晴方出，江女笙簫夜始吹。
春雨星攢尋蟹火，秋風霞颭弄濤旗。
宴宜雲鬢新梳後，曲愛霓裳未拍時。
太守三年朝不盡，郡齋空作百篇詩。

五言絕句

登鶴雀樓

唐王之渙

白石依山盡，黃河入海流。
欲窮千里目，更上一層樓。

登樓

唐韋應物

茲樓日登眺流歲暗蹉跎坐厭淮南守秋山紅樹多

登鶴雀樓

唐暢當

迴臨飛鳥上高出人世間天勢迴平野河流入斷山

北樓

唐韓愈

郡樓乘曉上盡日不能回晚色將秋至長風送月來

江樓

唐杜牧

獨酌芳春酒登樓已半醺誰驚一行鴈衝斷過江雲

高樓

唐于鄴

遠天明月出照此誰家樓上有羅衣色涼風吹不秋

七言絕句

芙蓉樓送辛漸

唐 王昌齡

丹陽城南秋海陰丹陽城北楚雲深高樓送客不能醉
寂寂寒江明月心

黃鶴樓送孟浩然之廣陵

唐 李白

故人西辭黃鶴樓煙花三月下揚州孤帆遠影碧空盡
惟見長江天際流

寄王舍人竹樓

唐
李嘉祐

傲吏身閒笑五侯
江西取竹起高樓
南風不用蒲葵扇
紗帽閒眠對水鷗

登清暉樓

唐
劉禹錫

潯陽江色添潮滿
彭蠡秋聲送鴈來
南望廬山千萬仞
共誇新出棟梁材

宅西有流水牆下構小樓
臨翫之時頗有幽趣

因命歌酒聊以自娛
獨醉獨吟偶題五首

錄一

唐
白居易

水色波文何所似
麴塵羅帶一條斜
莫言羅帶春無主
自置樓來屬白家

竹樓宿

白居易

小書樓下千竿竹
深火爐前一盞燈
此處與誰相伴宿
燒丹道士坐禪僧

登澧州驛樓寄京兆韋尹

唐
杜牧

一話涪陽舊使君
郡人回首望青雲
政聲長與江聲在

自到津樓日夜聞

望海樓晚景

宋
蘇軾

海上濤頭一綫來
樓前指顧雪成堆
從今潮上君須上
更看銀山二十回

其二

青山斷處塔層層
隔岸人家喚欲應
江上秋風晚來急
為傳鐘鼓到西興

鄂州南樓

宋
黃庭堅

四顧山光接水光
凭闌十里芰荷香
清風明月無人管
併作南來一味涼

雨中登岳陽樓望君山

黃庭堅

滿川風雨獨凭闌
綰結湘娥十二鬟
可惜不當湖水面
銀山堆裏看青山

雙城寺中登樓

金周昂

雲意生陰晚不收
西風疎雨一江秋
畫圖忽上闌干角
隱隱平灣轉釣舟

友雲樓

金
白
賁

霧幕烟迷十二闌
壺觴招我一躋攀
黃簾捲起湘川竹
分得西州數點山

東樓雨中

金
王元粹

水邊人靜燕爭泥
風動綠荷香滿谿
高樹繞樓遮望眼
獨看山色過牆西

其二

雨入谿樓不見山
雨晴依舊數峰閒
韋郎詩句王維畫

好在幽人指顧間

雨過登樓

元
劉秉忠

錦里春光曉望中雨餘花潤草蒙茸青山尚在浮雲裏
樓上分明見幾峰

湖光山色樓口占

元
顧瑛

天風吹雨過湖去谿水流雲出樹間樓上幽人不知暑
鈎簾把酒看虞山

其二

晴山遠樹青如薺野水新秧綠似苔落日湖光三萬頃
盡從飛鳥帶將迴

樓居春曉望元圃

元張雨

子晉新宮倚太霞繞湖烟火萬人家觀臺一面無人處
日出煙消都是花

御定佩文齋詠物詩選卷一百十九

欽定四庫全書

御定佩文齋詠物詩選卷一百二十

閣類

五言古

登州中新閣

北周庾信

跨虛凌倒景連雲距少陽
璇極龍鱗上雕甍鵬翅張
千尋文杏照十里木蘭香
開窓對高掌平坐望河梁
歌響聞長樂鐘聲徹
建章賦用王延壽書須韋仲將龍來隨

畫壁鳳起逐吹簟石作芙蓉影池如明鏡光花梁反披
葉蓮井倒垂房徒然思燕賀無以預鷓鴣翔

水閣朝霽奉簡雲安嚴明府

唐杜甫

東城抱春岑江閣鄰石面崔嵬晨雲白朝旭射芳甸雨
檻卧花叢風牀展書卷鈎簾宿鷺起丸藥流鶯轉呼婢
取酒壺續兒誦文選晚交嚴明府矧此數相見

登閣

宋陳與義

今日天氣佳登臨散腰脚南方宜艸木九月未黃落秋

郊乃明麗夕雲更蕭索遠遊吾未能歲暮依樓閣

豁然閣

宋程俱

雲霞墮西山飛帆拂天鏡誰開一窓明納此千頃淨寒
蟾發淡白一雨破孤迴時邀竹林交或盡剡谿興扁舟
還北城隱隱聞鐘磬

五言律

宿香山閣

唐賀朝

暝望春山閣梯雲宿半空軒窓閉潮海枕席拂煙虹朱

網防棲鴿紗燈護夕蟲一聞雞唱曉已見日曛曛

夜宿西閣曉呈元二十一曹長

唐杜甫

城暗更籌急樓高雨雪微稍通綃幕霽遠帶玉繩稀
門鵲晨光起檣烏宿處飛寒江流甚細有意待人歸

西閣雨望

杜甫

樓雨霑雲幔山寒著水城逕添沙面出湍減石稜生菊
蕊淒疎放松林駐遠情滂沱朱檻濕萬慮倚檐楹

宿竹閣

唐白居易

晚坐松檐下宵眠竹閣間清虛當服藥幽獨抵歸山巧
未能勝拙忙應不及閑無勞別修道即此是玄關

滕王閣

唐張喬

昔人登覽處遺閣大江隅疊浪有時有閒雲無日無早
涼先燕去返照後帆孤未得營歸計菱歌滿舊湖

登閣

宋朱子

橫空敞新閣高處絕炎氛野迴長風入天秋涼氣分憑

闌生逸想投迹遠人羣終憶茅檐外空山多白雲

艤舟登滕王閣

宋戴復古

散步登城郭維舟古樹傍澄江浮野色虛閣貯秋光却
酒淋衣濕搓橙滿袖香西風吹素髮猶逐少年狂

光霽閣晚望

宋真山民

一閣納萬象危闌俯渺茫白沙難認月黃葉易為霜宿
鳥投煙嶼歸樵趁野航孤吟誰是伴漁笛起滄浪

翁邨翠流閣

元尹廷高

四圍山翠合縹緲見危樓地狹星辰少雲深水石幽谿
聲晴亦雨松影夏如秋為語遊方者桃源豈外求

菌閣

元張雨

巖架菌芝閣榜題松雪扉雲來畫檐宿龍向墨池歸對
几琴三疊倚闌山四圍仙靈能夜降應得噉玄機

登天柱閣

明胡纘宗

與客上江樓橫江山欲浮雲當天柱出月傍小姑流帆
外收吳楚尊前落斗牛瀰漫忽千里倚檻思悠悠

五言排律

奉和聖製登朝元閣

唐錢起

六合紆元覽，重軒啟上清。
石林飛棟出，霞頂泰階平。
拂曙鑾輿上，晞陽瑞雪晴。
翠微回日馭，丹巘駐天行。
御氣升銀漢，垂衣俯錦城。
山通玉苑迴，河抱紫關明。
感物乾文動，凝神道化成。
周王陟喬嶽，列辟讓英聲。

望凌煙閣

唐劉公興

畫閣凌虛構，遙瞻在九天。
丹楹崇壯麗，素壁會勳賢。
靄

靄浮元氣亭亭出瑞煙
近看分百辟遠揖誤羣仙
圖列青霄外儀形紫禁前
望中空霽景驤首幾雷連

登福昌山閣

宋 蔡襄

危磴通高閣登臨境迥清
雲開千岫出雪霽一川明
斷鴈來孤影遙泉落細聲
野煙依竹見谿樹與橋平
已助騷人思徒搖遠客情
扁舟如可泛歷歷是江程

七言律

登昇元閣

唐 李建勳

登高始覺太虛寬，白雪須知唱和難。
雲度瑣窓金榜濕，月移珠箔水精寒。
九天星象簾前見，六代城池直下觀。
惟有上層人未到，金烏飛過拂闌干。

次韻孔憲蓬萊閣

宋趙抃

山顛危構傍蓬萊，水閣風長此快哉。
天地涵容百川入，晨昏浮動兩潮來。
遙思坐上遊觀遠，愈覺胷中度量開。
憶我去年曾望海，杭州東向亦樓臺。

運判南園瞻民閣

宋文同

青都高與紫霄通，獨凭危欄望不窮。
萬嶺過雲秋色裏，一峰擎雪夕陽中。
檐楹曉落天邊月，窓戶晴吹石闕風。
民吏安閒財賦足，管絃時復在層空。

題晉原舒太博清谿閣

文同

危閣飛空羽翼開，下蟠波面影徘徊。
光搖畫板月深淺，聲逸曲闌風往來。
暝色四郊煙莽蒼，曉雲千嶂雪崔嵬。
主人好客民無訟，日夕登遊對酒杯。

宿延平雙谿閣

宋 蔡襄

金方... 卷一百二十
鳴籟蕭森萬木聲濃嵐環合亂峰青樓臺矗處雙谿會
雷電交時一劍靈曉市人煙披霽旭夜潭漁火關寒星
畫屏曾指孤舟看今日孤舟是畫屏

登快閣黃明府強使和山谷先生畱題之韻

宋
戴復古

未登快閣心先快紅日半檐秋雨晴宇宙無邊萬山立
雲煙不動八窓明飛來一鶴天相近過盡千帆江自橫
借問金華老仙伯幾人無忝入詩盟

登淨江寺松風閣

元 尹廷高

巋然傑閣倚松岡，縱使無風也自涼。
四面闌干金碧界，萬家城郭水雲鄉。
清江疊嶂迷空閣，白鳥蒼煙墮渺茫。
風景不殊君記否，吳山頂上看錢塘。

題周南翁悠然閣

元 杜 本

大江之東彭蠡南，周家高閣與雲參。
秋風猿狖嘯青嶂，暮雨蛟龍起碧潭。
逸屋千叢生杞菊，過檐百尺長榎楠。
何時共此登臨樂，指點山川與縱談。

許茂勳烏柏閣

明葛一龍

地幽霜肅氣珊珊小閣高臨樹樹斑東顧不遮寒水渡
西來俱是夕陽山連雲送客當秋杪片月爭題落酒間
撤去四窓畱半榻儘教棲鷓看人閒

五言絕句

晚登郡閣

唐韋應物

悵然高閣望已掩東城關春風偏送柳夜景欲沈山

滕王閣春日晚望

唐曹松

凌春帝子閣偶眺日移西浪勢平花塢帆陰上柳堤

西閣

宋 朱子

借此雲窓眠靜夜心獨苦安得枕下泉去作人間雨

七言絕句

焦崖閣

唐 韋莊

李白曾歌蜀道難長聞白日上青天今朝夜過焦崖閣
始信星河在馬前

澄邁驛通潮閣

宋 蘇軾

倦客愁聞歸路遙
眼明飛閣俯長橋
貪看白鷺橫秋浦
不覺青林沒晚潮

巾子山翠微閣

宋戴復古

雙峰直上與天參
僧共白雲棲一菴
今古詩人吟不盡
好山無數在江南

丹青閣

宋徐璣

翠靄空霏忽有無
筆端誰著此工夫
谿山本被人圖畫
却道谿山是畫圖

天香閣

元韓性

闌干曲曲亂雲封
回首爐峰翠幾重
上界罡風秋萬頃
銀河開徧碧芙蓉

舟夜憶郡齋眺閣

明顧大典

舟移澤國暮煙長
望入蒼波思渺茫
遙憶郡齋清絕處
萬山孤閣夜焚香

御定佩文齋詠物詩選卷一百二十